

Potpisani novi sporazumi o saradnji

DELEGACIJA APEIRONA PONOVO U POSJETI RUSKIM UNIVERZITETIMA

Prof. dr Esad Jakupović, rektor Panevropskog univerziteta, prof. dr Branislav Mihajlović i prof. dr Branimir Čović početkom desetog mjeseca posjetili su Voronješki državni medicinski univerzitet i Državni tehnički univerzitet sa kojim je potpisan i sporazum o saradnji. Tokom boravka u Rusiji naša delegacija je u povodu obilježavanja 75-godišnjice boravila i na Adegejskom državnom univerzitetu u Republici Adegeji, Ruska Federacija, sa kojim je takođe uspostavljena saradnja.

U okviru posjete Voronješkom državnom medicinskom univerzitetu, čiji predstavnici su na Univerzitetu "Apeiron" bili u martu ove godine kada su ove dvije visokoškolske ustanove potpisale sporazum o saradnji, nastavili su se razgovori o daljem zajedničkom djelovanju. Naši profesori imali su priliku obići i nekoliko muzeja na Univerzitetu, kao i centar zdravstvene njege. Uzajamnim besjedama i najboljim željama rezultovala je i posjeta Dječijoj bolnici i Dijagnostičkom centru. Domaćini su omogućili obilazak mnogih istorijskih i kulturnih znamenitosti Voronježa i Voronješke oblasti.

- Samo jedan segment našeg sporazuma o saradnji obuhvata moja blok predavanja na Fakultetu zdravstvenih nauka Panevropskog univerziteta u narednom periodu i veoma sam srećan što ću neka moja iskustva prenijeti studentima našeg prijateljskog Univerziteta, kazao je prof. dr Aleksej Morozov, prorektor Medicinskog univerziteta.

Saradnja u oblasti razmjene studenata i postdiplomaca, razmjena nastavnih programa i nastavnika, te realizacija zajedničkih istraživačkih projekata obuhvaćena je ugovorom koji je Univerzitet "Apeiron" potpisao sa Voronješkim državnim tehničkim univerzitetom.

- Težeći razvoju prijateljskih odnosa između naših naroda i uzimajući u obzir zajednički interes u oblasti visokog obrazovanja, nauke i kulture veoma sam srećan što smo za novog partnera za razvoj i napredak dobili Panevropski univerzitet, naglasio je Petrenko Romanovič, rektor Voronješkog državnog tehničkog univerziteta.

Tokom posjete Adegejskom državnom univerzitetu koji je 8. oktobra obilježio jubilej, naša delegacija imala je priliku prisustvovati radu međunarodne naučne konferencije "Mehanizmi funkcionisanja unutrašnjeg sistema u procesu ontogeneze". Na plenarnoj sjednici ovog skupa rektor Univerziteta "Apeiron" bio je član radnog predsjedništva. Istog dana gosti su prisustvovali otvaranju naučno-obrazovnog geoportala kosmičkih usluga, kao i otvaranju izložbe scenskih kostima studentskog muzičkog pozorišta "Art-Ritin". U cjelokupan program uvrštena je i svečana sjednica Senata Univerziteta, na kojoj su visokoškolske ustanove potpisale sporazum o saradnji. Rektor Univerziteta domaćina pročitao je "Pozdravnu gramatu" na našem jeziku, koju je profesor Branimir Čović preveo na ruski. Nakon toga svečano je otvoren i renoviran studentski dom. Uveče

je za goste iz naše zemlje ali i cijelog svijeta priređen mjuzikl “Poslednji poklon Prometeja” u izvođenju studentskog muzičkog pozorišta. Dva dana poslije upriličeno je otvaranje sportskog centra – Doma sportova AGU.

- Kroz ovu posjetu još jednom je potvrđeno koliko je Panevropski univerzitet dobrodošao kao saradnik i partner u budućim velikim projektima “velikih” univerziteta Rusije. Zaista je čast raditi sa njima, naglsio je rektor Jakupović.

Banja Luka, 15. oktobar 2015. godina

Služba za odnose sa javnošću